

REGIONAL NEWS

HEADLINES:-

- 1. Bairabi atanga Sairang pawh Rel kawng siam hna chu zawhfel a ni a, a him tawh em tih enfiah mek niin kumin July thla atanga service tura ruahman a ni.
- 2. Lai Autonomous District Council ah CEM atan BJP hruaitu M.Kawnpui bialtu MDC, Pu N.Zangura ruat a ni.
- 3. WAVE Summit 2025 neih mekah tukin atang khan Global Media Dialogue tan a ni.
- 4. Prime Minister Narendra Modia chuan vawiin khan Kerala Vizhinjam International Deepwater Multipurpose Seaport a hawng.

<><><>

BAIRABI – SAIRANG RAILWAY LINE

Bairabi atanga Sairang pawh Rel kawng siam hna chu zawhfel a ni a, a him tawh em tih enfiah niin kumin July thla atanga service tura ruahman a ni.

Akashvani corr zawhna chhangin Northeast Frontier Railway Chief Public Relation Officer Kishore Sharma-a chuan Bairabi leh Sairang inkarah nilaini khan Rel tlantir chhin a ni a, hlawhtling takin a kilometre 51 chuang a zawh a ti a, nimin khan Rel tlan nawn tir chhin leh a ni a ti bawh.

Kan corr report lo ngaithla zui ang.

Ram zalen hnua a vawi khat nan Aizawl dai, Sairang thleng tura Rel kawng siam hi Sorkar laipui hmalakna pawimawh, Act East Policy tihhlawhtlinna pakhat a ni a, inkalpawhna tha leh tlawm bakah sum leh pai dinhmun tihhmasawn nana hmarchhak state te thlunzawm chu a tum ber a ni. He rel kawngah hian Station pali: Hortoki, Kawnpui, Mualkhang, leh Sairang-Sihhmui Station awm tura ruahman niin, leiverh 32, lei lian 55 leh lei te deuh 89 a awm dawn a ni.

Hetihlai hian Chief Minister Pu Lalduhoma’n vawiin khan North Eastern Railway General Manager Pu AK Chaudhary kawmin Bairabi rel station tihchangtlun hna leh Mualkhang station kalpawhna tur kawng bakah Sairang station hna kal mek leh hmalakna dang a sawi pui a, Pu AK Chaudhary chuan kumin June thla laihawlah Commission of Railway Safety Inspection neih a nih dawn bakah June ni 17 hnu lamah chuan hawn theiha an in peihfel hman an beisei thu a sawi a ni.

C Lalhmunsangi/ Akashvani News/Aizawl

<><><>

CM

Chief Minister Pu Lalduhoman vawiin khan Mizoram Universal Healthcare Scheme empanelled centre tur, Kidney 360 Dialysis Centre mi mal ta chu Aizawl Bazar Bungkawnah a hawng.

Chief Minister chuan hawnna thusawiin, health facility changtlung zawh mamawhna a sang zel a, sawrkar pawhin theihtawp a chhuah a. ICU te chu hnathawh theiin an siam deuh vek tawh a, thawktu pawh an la thar nasa a ni a ti a, hetihlai hian, sawrkar hmunhmain a daih seng lo va, Private clinic leh private hospital lam te thawhpaina an mamawh a. Anni an lo inthum tha ve zel chu a lawmawm hle a ni a ti.

<><><>

LADC

Lai Autonomous District Council ah Chief Executive Member atan BJP hruaitu M.Kawnpui bialtu MDC, Pu N.Zangura ruat a ni a, Governor in a ruatna chu vawiin khan tihchhuah a ni.

Pu N Zangura hi CEM ah lakluh a nih chuan tuna LADC Sorkar Term kallai ah Sorkar inthlak vawi li na tur leh CEM panga lakluhna a ni ang.

Vawiin khan Aizawla BJP Mizoram Office ah Pu N Zangura chu kan corr in a kawm a, Pu Zangura chuan District council te chu duhamna leh mahni in ngaihpaawimawh nate avangin

a ngelnghet lo fo thin a ti a. Tuntuma LADC ah CEM a nih chuan sorkar ngelnghet tak siam theih a in ring tih a sawi a ni.

Pu N Zangura chuan, Mizoram state sorkar chuan Mizoram mipuite mamawh mai bakah Autonomous District Council te mamawh a phuhru zolo a ti a, sorkar laipui a sorkarna chelh tu BJP chuan India rama state hrang hrang te hmasawnna tura theihtawp a chhuah mek a, Mizoram mipuite sum leh paia harsatna sut kian a nih theih nan BJP an zawm tih a sawi.

Hetihlai hian, LADC ah ZPM Sorkar a din reng laia CEM dang ruat a ni chu LADC Chairman Pu T.Zakunga chuan mak a tih thu a sawi a.

Tun dinhmun ah LADC ah ZPM Sorkar Pu V.Zirsanga kaihhruai chu thiah a la nilo tih ZPM Sorkara LADC Chairman Pu T.Zakunga chuan Lawngtlai a Aksahvani corr in a kawmnaah a sawi a, Pu V.Zirsanga chu CEM atan pawm a nih hnuah Ni 30 chhunga thlawptu a neihdan fiahtura tih a nihlaiin, fiah a nihtheihna tura LADC Session koh nimahse, Session neih dawn ah Chairman leh Dy. Chairman an ban vangin Session hi neihtheih a nilo a ti a, hemi chungchang hi Governor ah pawh hriattir a ni a, tunah LADC ah ZPM Sorkar a dinreng laiin CEM thar ruat a ni ngawt mai chu hriatthiam harsa a tih thu Pu T.Zakunga chuan a sawi.

Kan corr report lo ngaithla ang.

LADC Sorkar ah kumin February ni 27 khan ZPM hruiatu Pu V.Zirsanga chu CEM atan lakluh a ni a, March 17 khan Executive Member pakua lakluh an ni leh a, Sorkar dinglai chuan Emergency Session pawh kumin April 17 atanga 22 khan paltlangin Budget pawh passed a nih hnu ah, ZPM Sorkar chu a nging a, United Democratic Alliance MNF, MDC 11 leh ZPM atanga BJP zawmtu MDC 2 bak ah pawnlam atanga thlawptu Congress MDC pakhat nen, BJP hruiatu Pu N Zangura chuan LADC ah thlawptu a ngah tawk thu leh Sorkar na siamtir turin Governor ah ngenna a thlen a, he thu kalzel ah hian Pu N Zangura chu Governor in CEM a a ruatna chu vawiin khan tihchhuah a ni a, Ni 10 chhungin thlawptu a neihdan fiah tur a tih a ni.

United Democratic Alliance lama an hruiatu pakhat chuan Chairman leh Dy.Chairman an ban hnu ah pawh Floor Test nei turin humtiam a ralloh thu leh, hmalakzuina a awmloh avangte, Governor thu anga Floor Test neitura hriattir nawnna pawh bawhzui a nih loh avang te in tun dinhmun ah Pu V.Zirsanga chuan thlawptu Member a neihngah tawklloh vangin LADC ah CEM pahnih awm anga sawichu mipui rilru hruiakawina a nih thu a sawi.

Lalnggheta Ralte/Akashvani News/Lawngtlai

<><><>

BADMINTON

Yonex-Sunrise All India Junior Ranking Badminton Tournament 2025 neih zawh takah, vawiin khan mipa kum 19 hnuai lam inelnaah Mizo rawlthar H. Lalthazuala a champion.

India rama Badminton inelna lian leh ngaihhlut hlawh hi Panchkula, Haryana-ah neih a ni, Thazuala hi seeded 11-na a ni a, final-ah seeded pathumna Ansh Negi chu 21-19, 21-16 (straight set) hmangin a hneh. A champion kalkawngah hian Mahendra Kalahasthi, Dhyan Santosh, Dev Ruparelia leh Pranaav Ram N te a hneh vek bawk a ni.

Chanmari West rawlthar Thazuala a hlawhtlin bakah hian C. Lalramsanga chuan U-19 Mixed doubles leh U-19 Boy’s doubles-ah silver medal a hlawh chhuak ve ve bawk a, Girls Double huangah Lalrempuii chu Tanoo Chandra-i nen inkawpin bronze medal an vaw chhuak ve bawk.

<><><>

AMC

Aizawl Municipal Corporation chuan nimin khan thuchhuah siam in Mizoram Legislative Assembly leh a chhehvel - Venghlui Local Council leh Tuikual South Local Council huam chhunga chawhmeh zuar a thu thin te chu thu tawhlo turin an ngen.

AMC chuan dan in thuneihna a pek angin, helai huuam chhung kawngkam a inzawrh phal lohna hmuna puan a lo nih tawh avangin, dan zawma thu tawh lo turin thuchhuah hi an siam a, AMC Municipal Commissioner Pu Joseph H Lalramsanga chuan Venghlui leh Tuikual South huamchhunga thil zuar thin te chu AMC Multi-Complex Tuikual South-ah in sawn vek turin a ngen a. kawng kama thil zawrh phal lohna hmunah thut phal anilo tih sawiin dan palzut te hi cheng sang 5 thleng chawi tir theih annih bakah an thilzawrh man sak theih anni a ti a, mipuite chu phalna hmuna thil zuarte dawr turin an ngen tih an sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.
Naktuk zing dar 7 leh a chanve-ah Chanchinthar puan leh a ni ang.

<><><>

WAVES 2025

WAVE Summit 2025 neih mekah tukin khan Global Media Dialogue tan a ni. Jio World Convention Centre-a Summit neih mekah hian khawvel media leh entertainment lama mi lian tak takte nen ramchhunga hmasawnna tur sawiho a ni. Puan tawh angin WAVE Summit 2025 hi nimin khan Prime Minister Narendra Modia chuan a hawng a. Global Media Dialogue hi Union Ministry of Information and Broadcasting-in Ministry of External Affairs nen thawkdun a an huaihawt a ni a.
Hawna inkhawmah thusawiin External Affairs minister Dr.S.Jaishankar-a chuan technology leh tihdanphung lo awmsa te chu an kal rual tur a ni a ti a. Kum 2047-a ram changkang dinhmuna ding turin technology chu a nawrkaltu atan a pawimawh a, hnam tihphunga inghat anih a ngai thung a ti bawk. He hunah hian Union I&B Minister Ashwini Vaishnaw pawhin thusawiin khawvel pumah media leh entertainment Industry te hlut zawng chu dollar tluklehding 1000 chuang hu a ni a ti bawk.

<><><>

PM

Prime Minister Narendra Modia chuan vawiin khan Kerala Vizhinjam International Deepwater Multipurpose Seaport a hawng. Vizhinjam hi ramchhunga semi-automated port hmasa ber a ni a. PM Modia chuan tuipui lama hmasawnna ruhrel din kawngah rahbi thar pawimawh tak anih thu a sawi a. Vizhinjam Port chu tunlai mil hmasawnna pholangtu anih thu leh eibar zawna kawngah ram tan leh Kerala tan hlawkna tam tak a thawkchhuak dawn tih a sawi a ni.

<><><>